



RECORDANDO CARLOS GARDEL 57 AÑA DI SU DESAPARICION

ORANJESTAD (AAN): CARLOS GARDEL tambe a bira tópicu di ARUBA ANTAÑO, ya cu promé cu e accidente na Medellin, Colombia dia 24 di Juni 1935 (un dia manera awe), for di tanto di numeroso presentacion den diferente pais, Gardel tabatin presentacion ariba nos isla, cu awor ta un pais.

E asina yamá Gaucho Argentino a yega Aruba bordo di Snip, un di e prome avionnan den e linea aerea di KLM, bisti cu un carson di bayete, zapaton preto cu blanco y su stetshat. El a tuma e enano bonereano Max como su mascota pa compañé. El a hospeda den Hotel Strand den Wilhelmina straat net dilanti di El Gaucho awendia, y a presenta primeramente na San Nicolas den Teatro Royal cu despues a haya e nomber di Teatro Principal, pa despues presenta den Teatro Gloria, unda cu awendia ta un parkeerplaats, net patras di e abandonado edificio di No.1.

Den Teatro Gloria el a ricibi un bouquet di flor for di man di srta. Henriquez (q.e.p.d.) ruman di Vi Henriquez y tanta di Hans Henriquez. Su actuacion a inspira un grupo

cu a lanta cargando e nomber di Los Trovadores, integra pa Clemente Lacle (q.e.p.d.) como e gaucho arubano como cantante, hunto cu Harold, Shemmy Coronel, Jan Eusebio Croes (q.e.p.d.) Booi y lo demas. Tambe e cancionnan rioplatense tabata inspiracion pa Tali Lopez (q.e.p.d.), y conoci despues como un di e mas grandi den tango di nos isla.

Despues di su presentacion na Aruba, Carlos Gardel a sali pa Colombia, pa diferente di su showman, pero destino a pone un paro na esaki, despues di esun di Medellin, unda cu a tuma lugar e tragico accidente ora cu dos trimotor a dal den otro na e momento di su rancada pa tuma vuelo pa sigi pa Cali, e avion a sali for di e pista bay dal den otro cu tabata spera su turno pa tuma e extremo di e pista pa lanta vuelo. Tur e dos trimotornan a pega candela y mayoria di e ocupantenan a muri carbonizá.

E cadaver di Gardel a ser reconoci dor di su camisa, su pasaporte cu tabata di Uruguay, y dor di un chapa cu ta bisa "Carlos Gardel, Juan Juarez 735, Buenos Aires" y den un di su saconan mitar kimá e tabatin su pasaporte cu e chapa cu e indentificacion ariba menciona.

Hunto cu Gardel a muri su compañeronan cu ta Alfredo Lepera, Angel Riverol, Guillermo Barbieri, Alonso Azzaf, Celedonio Palacios y Jose Copas Moreno.

Dos aña despues na 1937 despues di e tragedia, e restonan mortal di Carlos Gardel a ser hibá Buenos Aires hunto cu esnan di su compañeronan. Gardel a graba su promé disco na aña 1917 cual e compania Odeon a titula esaki "Cantar Eterno". Gardel a cubri trayectoria mas brillante di e cancionnan rioplatense.

Na su labionan a sali versonan cobra dor di su fuerza emocional maximo, pasobra tabata duna e calor na esakinnan cu su voz criollo, varonil y bunita. El a haci gala di un inspiracion fecundo cu a duna e musica rioplatense cancionnan cu lo no muri hamas.

Carlos Gardel a nace na Toulouse, ciudad sureña di Francia, dia 11 di December di 1890. Bordo di e barco "D... Pedro" el a yega den e haaf di Buenos Aires den compania di mama Bertha Gardes, dia 11 di Maart di 1893. Den aña 1910 el a frecuenta rond di e Mercado del Abasto, unda e tabata reuni cu su amigonan y canta pa nan. Su voz a atrae na un auditorio cu tur anochi tabata deleita cu su interpretacionan criollo den e Café O'Rodeman. Gardel su prome pelicula tabata "Las Luces de Buenos Aires", y esun cu varios cantante popular di awendia ta brilla cun'e ta "El Dia Que Me Quieras".

Diasabra ultimo Francisco di e popular show Sabado Gigante cu ta ser pasa na Canal 12 Venevision, tabatin un bunita homenaje na Carlos Gardel, caminda nos por a mira e caya Gardel na Argentina, y su statua cu ta ser bishita cu bastante frecuencia, y su unico cas cu a ser converti den un sitio recordatorio pa Gardel, unda cu solamente ta ser interpreta tangos di e Gaucho Argentino, cu den mundo apesar di su desaparicion a keda inmortal, ya cu awe ta 57 aña cu el a fallece den e tragico accidente na Medellin, Colombia.

Awe merdia 1:30 den e programa "Lo Exclusivo" un homenaje na Carlos Gardel caminda nos por scucha e voz inmortal di e Gaucho Argentino cu algun di su cancionnan rioplatense, y Nota Piano Bar tambe lo tin un anochi na memoria di Carlos Gardel.

DIARANZON
24 di Juni

Nota Piano Bar & **Cocktail Lounge**

ta presenta un
UN NOCHI di Tango y
HOMENAJE NA

CARLOS GARDEL
DEN SU 57 ANIVERSARIO di
FALLECIMIENTO